

Headlines

1. उपराज्यपाल मनोज सिन्हा होरें वंदे मातरम दे विशेष गेड़ दे समापन समारोह च शिरकत कीती। उनें आखेआ जे समाज दे हर वर्ग गी इक्के सुखना सांझे तौरा पर दिखना लोड़चदा, ओह एहू भारत गी दुनिया दा बेहतरीन मुल्ख बनाना।
2. उपमुख्यमंत्री सुरिंद्र चौधरी होरें आखेआ जे जम्मू-अखनूर फोर लेन प्रोजेक्ट अगेत्रे चरण च ऐ ते बाकी रौहंदा कम्म 2026 दे अहू मझाटै तगर पूरा करना मित्थेआ गेदा ऐ।
3. जम्मू च माइग्रेंट कैंपें दी मरम्मत ते नमेंया सिरेआ निर्माण लेई 8 ज्हार 490 लक्ख 15 ज्हार रपे दी तफसीली रिपोर्ट तैयार करी लैती गेदी ऐ ते कश्मीर च 6 ज्हार बादू आरजी रिहायशें दा निर्माण कीता जा'रदा ऐ।
4. दिल्ली पुलस दे विशेष सीगै नै गाजीपुर इलाके थमां इक वांछित आतंकवादी गी गिरफ्तार कीता ऐ।
5. जम्मू-कश्मीर दी शान शीतल देवी होरें'गी विश्व तीरंदाजी नै ब'रे 2025 दा सर्वश्रेष्ठ पैरा तीरंदाज चुनेआ ऐ।

LG-Vande Matram

उपराज्यपाल मनोज सिन्हा होरें वंदे मातरम दे विशेष गेड़ दे समापन समारोह च हिस्सा लैता। एहूदा आयोजन 23 मार्च थमां अज्जै तगर कीता गेदा हा। इस मौके पर बोलदे होई उपराज्यपाल मनोज सिन्हा होरें आखेआ जे समाज दे हर वर्ग गी इक सुखना सांझे तौरा पर दिखना लोड़चदा ते ओहू ऐ भारत गी दुनिया दा बेहतरीन मुल्ख बनाना। उनें केंद्र शासित प्रदेश दे हर नागरिक गी आखेआ जे ओहू अपने आपा गी राष्ट्र निर्माण लेई समर्पित करी देऐ तां जे इस अगगे बददे मुल्ख गी कोई रोकी नेई सकै। उपराज्यपाल होरें आखेआ जे प्रधानमंत्री नरेंद्र मोदी हुंदी अगुवाई च जम्मू-कश्मीर बी राष्ट्री प्रगति च पूरी चाल्ली शामिल ऐ।



Dy. CM NH-144

उपमुख्यमंत्री सुरिंद्र चौधरी होंरें आखेआ ऐ जे जम्मू-अखनूर फोर-लेन प्रोजैक्ट अगेत्रे चरण च ऐ ते बाकी रौहंदा कम्म 2026 दे अह च पूरा करना मिथेआ गेदा ऐं एहू गल्ल उपमुख्यमंत्री होंरें विधानसभा च विधायक मोहन लाल हुंदे आसेआ पुच्छे गेदे सोआलै दे परते च आखी। उनें जानकारी दिती जे पैकेज इक 31 मार्च 2026 तगर मुकम्मल होई जाहग ते पैकेज 2 पैहले गै सबूरा होई चुके दा ऐ। पैकेज 3-A तैहत कम्म 30 अप्रैल ते पैकेज III-B तैहत कम्म 31 जुलाई 2026 तगर सबूरा होने दी मेद ऐ।

<><><><><><>

Dy CM Transit Accomodation

उपमुख्यमंत्री सुरिंद्र चौधरी होंरें आखेआ जे जम्मू च माइग्रेंट कैपें दी मरम्मत ते नमें सिरेआ निर्माण लेई 8 ज्हार 490 लक्ख 15 ज्हार रपें दी तफसीली परियोजना रिपोर्ट तैयार करी लैती गेई ऐ ते कम्में गी अंजाम देने लेई वित्त मैहकमे कन्नै गल्लबात कीती गेई ऐ। डिप्टी सी.एम होंरें एहू गल्ल विधायक देवयानी राणा हुंदे आसेआ विधानसभा च पुट्टे गेदे सोआलै दा परता दिंदे होई आखी। उनें आखेआ जे प्रधानमंत्री पैकेज तैहत नियुक्त कीते गेदे प्रवासी मुलाजमें गी फौरी तौरा पर ते सुरक्षित रिहायश उपलब्ध करोआने लेई कुलगाम दे वेसू, पुलवामा दे हावल, कुपवाड़ा दे नटनुसा ते बारामुला दे वीरवान च बुनियादी सहूलतें कन्नै लैस आरजी रिहायश कायम कीते गेदे न। उनें आखेआ जे समर्थ बधाने गितै चरणबद्ध तरीके कन्नै तकरीबन 6 ज्हार बाद्दू ट्रांजिट रिहायश दा निर्माण कीता जा'रदा ऐ।

<><><><><><>

Itoo-HDF

सेहत ते मेडिकल शिक्षा मंत्री सकीना इत्तू होंरें अज्ज विधानसभा गी जानकारी दिती जे अस्पताल विकास कोष (HDF) दे कर्मचारी जम्मू-कश्मीर दे सेहत इदारें च लगातार कम्म करा'रदे न। उनें गी फौरी तौरा पर कम्म करने सरबंधी जरूरतें गी पूरा करने लेई तकनीकी ते सहायक सेवां उपलब्ध कराने आस्तै लाया गेदा हा। मंत्री होंरें एहू गल्ल अज्ज विधानसभा च विधायक शब्बीर अहमद कुल्ले हुंदे आसेआ एडहॉक दे तौरा पर लाए जाने आहले कर्मचारियें दे

बारै च पुच्छे गेदे सोआलै दे परते च आक्खी। उनें आखेआ जे सेहत इदारे च सेवाएं दी निरंतरता गी यकीनी बनाने लेई एच.डी.एफ वर्करें गी आरजी तौरा पर घट्टोघट्ट मानदेय पर लाया गेदा ऐ।

<><><><><><>

Terrorists Arrest

दिल्ली पुलिस दी विशेष सीगे नै राजधानी दे गाजीपुर इलाके थमां इक्क वांछित आतंकवादी गी गिरफ्तार कीता ऐ। मीडिया कन्नै गल्लबात करदे होई दिल्ली पुलिस दे विशेष सीगे दे अतिरिक्त आयुक्त प्रमोद सिंह कुशवाहा होरें दस्सेआ जे एह आरोपी हाल च गै फगड़े गेदे इक्क आतंकी मॉड्यूल दा संचालक हा। उनें दस्सेआ जे आरोपी थमां बांग्लादेश, नेपाल ते पाकिस्तान दी विदेशी मुद्रा बरामद कीती गेई ऐ। पुलिस नै ओहदे थमां इक्क नेपाली सिम कार्ड बी बरामद कीता ऐ।

<><><><><><>

Archery-Sheetal Devi

भारत दी शीतल देवी गी विश्व तीरंदाजी नै बरे 2025 दा सर्वश्रेष्ठ पैरा तीरंदाज चुनेआ ऐ। जम्मू-कश्मीर दी 19 बरे दी शीतल देवी पिछले बरे दक्खन कोरिया दे ग्वांगझू च आयोजित विश्व पैरा तीरंदाजी चैंपियनशिप च महिला कंपाउंड व्यक्तिगत स्पर्धा च स्वर्ण पदक जित्ते आहली पैहली ते इकमात्र बगैर बांहू आहली तीरंदाज बनियां। उनें विश्व चैंपियनशिप च महिला टीम दा रजत ते मिक्सड टीम दा कांस्य पदक बी जित्ते दा ऐ। शीतल नै पेरिस पैरालंपिक्स च मिक्सड टीम स्पर्धा च कांस्य, एशियाई पैरा गेम्स-2022 ते एशियाई चैंपियनशिप-2023 च रजत पदक अपने नांइ कीता ऐ। पुरुष वर्ग च 'साल दा सर्वश्रेष्ठ तीरंदाज' तुर्कीए दे एमिरकान हैनी गी चुनेआ गेआ ऐ। बरे दा सर्वश्रेष्ठ युवा तीरंदाज' दा पुरस्कार फ्रांस दे बैपटिस्ट एडिस गी ते बरे दी सर्वश्रेष्ठ टीम' दा पुरस्कार कोरिया दी रिकर्व पुरुष टीम नै जित्तेआ ऐ।

<><><><><><>

Election House Committee

जम्मू-कश्मीर विधानसभा सचिवालय नै सदन दी कमेटियें दे चुनाएं लेई अज्ज अधिसूचना जारी कीती ऐ। स्पीकर अब्दुल रहीम राथर हुंदे आसेआ जारी हुकमै मुजब असेंबली दे 3 माली कमेटियें लेई 11-11 मिम्बरें दे गठन लेई चुनांS करोआए जाडन। अधिसूचित कार्यक्रम मताबक नामांकन दाखल करने दी खीरी तरीक 4 अप्रैल 2026 दपैहरी 3 बजे तगर ऐ जिसले के नामांकनें दी जांच 6 अप्रैल गी कीती जाह्गं नामांकन वापस लैने दी खीरी तरीक 8 अप्रैल तय कीती गई ऐ। जेकर मतदान दी लोड होग तां एहू मतदान 13 अप्रैल 2026 गी दपैहरी 3 बजे तगर करोआया जाह्ग।

<><><><><><>

Haji's-Training

भारती हज कमेटी नै जिला प्रशासन पुंछ दे सहयोग कन्नै पुंछ थमां ताले गेदे 119 हज श्रद्धालुएं लेई सिखलाई सत्र दा सरिस्ता कीता। इस सिखलाई सत्र दा उद्घाटन ए.डी.सी पुंछ ताहिर मुस्तफा मलिक होरें कीता। इस दरान हज कमेटी दे माहिरें सिखलाई दिती। एडीसी पुंछ ताहिर मुस्तफा होरें मीडिया कन्नै गल्ल करदे होई आखेआ जे हज पर जाने आहलें गी सिखलाई दिती गई ऐ।

<><><><><><>

Kishtwar Vande Matram

किश्तवाड़ दे डिप्टी कमिशनर पंकज शर्मा हुं'दे निर्देश मुजब वंदे मातरम आहली बशेष गेड़ दे इक हिस्से दे तौरा पर मुख दे शहीदें दे सम्मान च किश्तवाड़ जिले च बड्डे पैमाने पर सफाई अभियान चलाए गए। किश्तवाड़ दे ऐतिहासिक चौगान मैदान च चलाए जा करदे बड्डे सफाई अभियान दी अगुवाई किश्तवाड़ दे ए.डी.सी पवन कोतवाल होरें कीती। जिला मुख्यालय च आयोजित इस कार्यक्रम दे अलावा जिले दे बक्ख-बक्ख शैक्षणिक इदारे ते सरकारी दफतरें च बी साफ-सफाई अभियान चलाए गए जिंदे च साफ-सुथरे पर्यावरण लेई समुदाय गी इकजुट जत्त च शामिल कीता गेआ।

<><><><><><>